

## CCLXVI

**1419-III-28, Madrid.— Juan II al Concejo de Murcia para que siga siendo su recaudador Ferrán Gómez de Herrera. (A.M.M. Cart. Real 1411-1429, fols. 61v-62v.)**

Don Juan por la gracia de Dios, rey de Castilla, de Leon, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Vizcaya e de Molina; a vos los conçejos, e alcalles, e alguaziles, e regidores, e jurados, e omes buenos, ofiçiales qualesquier de las çibades de Cartagena e Murçia, e de todos las villas e lugares del obispado de la dicha çibdat de Cartagena e regno de Murçia de la dicha çibdat de Murçia, segund suelen andar en renta de alcavalas, terçias e otras mis rentas en los años pasados, e a los fieles, e arrendadores, e cogedores, e recabdadores que ovieredes cogido e recabdado, e cogieredes, e recabdaredes, e ovieredes de coger e recabdar en renta o en fialdat, o en otra manera qualquier alcavalas, e terçias, e almosarifadgos, e otros pechos, e derechos, e miniegas, e yantares, e portadgos que a mi pertenesçen e pertenesçer deven en qualquier manera, e yo mande arrendar e coger en esas dichas çibdades, e villas, e lugares del dicho obispado de Cartagena e reyno de Murçia este año de la data desta mi carta, e a los terçeros, e deganos, e mayordomos, e otras personas qualesquier que ovieredes arrendado o arrendaredes, e ovieredes a coger e cogieredes las dichas terçias que a mi pertenesçen e pertenesçer deven en el dicho obispado de Cartagena e regno de Murçia del fruto que començo por el dicho dia de la Asençion del año primero que viene de mill e quatroçientos e veynte años, e a las aljamas de los judios e moros de las dichas çibdades, e villas, e lugares del dicho obispado de Cartagena e reyno de Murçia, e a qualquier e a qualesquier de vos que esta mi carta vieredes o el traslado della sygnado de escrivano publico, salud e gracia.

Sepades que mi merçed es que Ferrand Gomez de Ferrera sea mi recabdador mayor del dicho obispado de Cartagena e reyno de Murçia segund que lo fuere el año que paso de mill e quatroçientos e diez e ocho años, e que coja e recabde por my todos los maravedis e otras cosas que montan e montaren en las dichas mis rentas de las dichas alcavalas, e terçias, e almosarifadgos, e miniegas, e yantares, e escrivanias, e portadgos, e cabeças de pechos de judios e moros, e otros pechos e derechos desas dichas çibdades, e villas, e lugares del dicho obispado de Cartagena e reyno de Murçia e este dicho año, salvo el serviçio, e medio serviçio de los dichos judios e moros que fue mi merçed de la entregar a otras personas.

Porque vos mando, vista esta mi carta o el dicho su traslado, signado como dicho es, a todos e a cada uno de vos en vuestros lugares e jurediçiones que resçibades e fagades recodir al dicho Ferrand Gomez de Ferrera, mi recabdador mayor, o al que lo oviere de recabdar por él, con todas los maravedis e otras cosas qualesquier que montaren e montaron e rendieren en qualquier manera las



dichas alcavalas, e terçias, e almoxarifadgos, e miniegas, e yantares, e escrivanias, e portadgos, e cabeças de pechos de judios e moros, e otros pechos e derechos que me pertenesçen e pertenesçer deven en el dicho arçobispado de Cartagena e reyno de Murçia en qualquier manera este dicho año bien e conplidamente, en guisa que le non mengue ende alguna cosa e dagelos a los plazos en la manera que los avedes a dar e pagar a mi, e de lo que asy dieredes e pagaredes al dicho Ferrand Gomez de Ferrera, mi recabdador mayor, o al que lo oviere de recabdar por él, tomad sus cartas de pago e seed vos han resçibidos en cuenta, e a otro alguno ni algunos non recudades ni fagades recodir con ningunos ni algunos maravedis de las dichas rentas de las dichas alcavalas, e terçias, e portadgos, e myniegas, e yantares, e escrivinas, e portadgos, e cabeças de pechos de judios e moros, e otros pechos e derechos de sus dichos çibdades de todas las dichas villas e lugares del dicho su obispado de Cartagena e reyno de Murçia al dicho Ferrand Gomez de Ferrera, mi recabdador mayor, o al que lo oviere de recabdar por él, sy non sed çiertos que quanto de otra guisa dieredes e pagaredes que lo perderedes e vos non sera recabdo en cuenta e aver hedes a pagar otra vez, e por esta mi carta o por el dicho su traslado, signado como dicho es, mando a los dichos conçejos, e a los alcalles, e alguaziles, e ofiçiales que lo fagades asy pregonar publicamente por las plaças e mercados desas dichas çibdades, e villas, e lugares del dicho obispado e reyno, e sy vos los dichos arrendadores, e fieles, e cogedores, e fiadores, e aljamas, e algunos de vos non dieredes e pagaredes al dicho Ferrand Gomez de Ferrera, mi recabdador mayor, o aquel o aquellos por por él ovieren de aver e recabdar todos los dichos maravedis e otras cosas que devades o devieredes o ovieredes a dar de las dichas alcavalas, e terçias, e de portadgos, e miniegas, e yantares, e escrivanias, e portadgos, e cabeças de pechos de judios e moros, e otros pechos e derechos del dicho obispado de Cartagena e reyno de Murçia a los dichos plazos e a cada uno dellos, segund dicho es, e por esta mi carta o por el dicho su traslado, sygnado como dicho es, mando e do poder conplido al dicho Ferrand Gomez de Ferrera, mi recabdador mayor, o al que lo oviere de recabdar por él que vos prenda los cuerpos e vos tenga presos e bien recabdados en su poder e entre tanto que entren e tomen todos vuestros bienes muebles e rayzes do quier que los fallaredes e los vendan e rematen asy como por nuestro del my aver el mueble a terçer dia e la rayz a nueve dias, e de los maravedis que valieren que se entreguen los maravedis que devades e oviredes de aver con las costas que sobre esta razon fizieren a vuestra culpa en los cobrar e algunas por qualquier o cualesquier que los dichos bienes conpraren que por esta razon fueron vendidas, yo por esta mi carta o por el dicho su traslado, signado como dicho es, que los faga sanos por agora e por sienpre jamas, e sy bienes desenbargados non vos fallaredes, a vos los dichos cogedores e fiadores para cunplimiento de todos los dichos maravedis que devieredes e ovieredes a dar al dicho Ferrand Gomez de Ferrera, mi recabdador mayor, o al que lo oviere de recabdar por él, que vos lieven e puedan lievar presos en su poder de una villa a otra e de un lugar a otro a do ellos quisieren e vos tenga presos e bien recabdados, e vos non den suelta nin fiados fasta que dedes e paguedes todos los maravedis que cada uno de vos



devieredes e ovieredes a dar de las dichas mis rentas con las dichas costas en la manera que dicha es, e sy porque eso que dicho es menester oviere ayuda el dicho mi recabdador, o los que lo ovieren de recabdar por él, mando a vos los dichos conçejos, e justiçias, e otros ofiçiales del dicho obispado de Cartagena e del reyno de Murçia, e de todas las otras çibdades, e villas, e lugares de los mis reynos e señorios e de cada una dellas que agora son e seran de aqui a delante, e a qualquier mi vasallo e portero que se y acahesçiere e qualquier e qualesquier dello que les ayudedes e ayuden en todo los que vos dixeren de mi parte que an menester vuestra ayuda, en tal manera que se fagan e cunpla esto que yo mando. E los unos e los otros non fagades ni fagan ende al por alguna manera so pena de la mi merçed e de diez mill maravedis a cada uno de vos para la mi camara, salvo sy los sobredichos mostraren luego syn alongamiento de maliçia paga que del dicho mi recabdador, o el que lo oviere de recabdar por él, e demas por qualquier o qualesquier de vos los dichos conçejos, e justiçias, e ofiçiales por quien fincar de lo asy fazer e conplir, mando al ome que vos esta mi carta mostrare o el dicho su traslado, signado como dicho es, que vos enplaze que parescades ante mi en la mi corte do quier que yo sea, los conçejos por vuestros procuradores suficietes, e uno o dos de los ofiçiales de cada lugar personalmente con personeria de los otros, del dia que vos enplazare a quinze dias primeros siguientes por la dicha pena a cada uno a dezir por qual razon non conplides mi mandado, e de como esta mi carta vos fuere mostrada o el dicho su traslado, sygnado como dicho es, e los unos e los otros la cunplieredes mando sola dicha pena a qualquier escrivano publico que para esto fuere llamado que de ende al que vos la mostrare testimonio signado con su signo porque yo sepa en como conplides mi mandado.

Dada en la villa de Madrit, a veynte e ocho dias del mes de Março, año del nascimiento del nuestro Señor Ihesucristo de mill e quatroçientos e diez e nueve años. Yo Iohan Rodriguez de Roa la fiz escribir por mandado de nuestro señor el rey. E en las espaldas de la dicha carta estavan estos nonbres que se siguen: Alfonso Gonçalez, Nicolas Martinez, Iohan Rodriguez, Sancho Ferrandez, Pero Ruyz.

